




AJANGIZKO UDALA



BANDOA

Ajangizko Udal Osoko Bilkurak 2019ko irailaren 25ean ospatutako ez ohiko batzarrean, mozio hau onartu zuen.

KLIMA ALDAKETAREN AURKEZ KONPROMISOAK HARTZEKO MOZIOA

Larrialdi klimatikoa datozen urte eta hamarkadetako agendan sartu da. Gure ongizatearentzako mehatxua bihurtuz. Mundu mailako eta Euskal Herriko egoera eta joerak ez du baikortasunerako tarte handiegirik uzten. Gazteentzako dagoeneko kezka nagusia bihurtu da, ez bakarrik larrialdia, baita gaiari ematen zaion erantzun politiko eskasa ere.

Azken urte luzeetan komunitate zientifikoak aldaketa klimatikoaren bilakaeraren inguruko abisuak eta jakinerazpenak igorri ditu. Aldaketa klimatikoa, Berotegi Efektuzko Gasen isuri masibo baten ondorioz gertatzen ari da, eta isuri horien arrazoi nagusia, bakarra ez bada ere, gure metabolismo sozioekonomikoa mantentzeko erretzen ditugun baliabide fosilen erabilpenean datza. Aldaketa klimatikoa, beraz, guk eragiten dugu nagusiko, eta dagoeneko ondorioak antzematen hasiak gara.

Urtez urte argitaratutiko txostenetan, egoera kezkaten ari denaren zantzuak ditugu. Nazioarteko hainbat erakunde eta lantaldeek argitaratzen dituzten txostenetan gero eta argiago esaten da klima eta energia politikan, eta ondorioz gure egunerokotasunean, eraldaketa sakon bat, iraultza bat, eman behar dela, baldin eta egoerari aurre egin nahi baldin badiogu eta aldaketa klimatikoaren efektu bortitzenak pairatu nahi ez baditugu. 2018ko urrian, IPCC Klima Aldaketari Buruzko Gobernu Arteko Taldeak, plazaturiko txosten berezi batean tonua altxa zuen indarrean dauden politikek behar besteko anbizioz ez dutela salatuz, eta elektrizitatearen, nekazaritzaren, garraioaren eta industriaren sektoreetan aurrekaririk gabeko aldaketak eskatuz.

2018ko azaroan, Nazio Batuen Ingurumen Panelak aditzera emandako txostenak egoera larria dela ohartarazten du, esfortzuak areagotzen ez badira hondamendira goazela azpimarratuz.

Gaia beste osotasunean ikusirik, argi dago ataka batean gaudela eta orain arte proposatu eta egindakoa berraztertu beharrean gaudela. Ahal dela, eta industria iraultza aurretiko egoerarekin alderatuta, 1,5°Cko tenperatura igoera ez gainditzea helburutzat zuen 2015eko Parisko Akordioa betetzeko, orain arte emandako pausoak guztiz ez-nahikotzat jo beharrean gaude.

Hasieran genion bezala, zibilizazio erronka baten aurrean gaude, eta aurrez-aurre Jaurlaritzaren eragin esparru gainditzen dituen lanak baditugu ere, egoerak partekaturiko esfortzu bat eskatzen du.

Gure ustetan, ipar orratza ahalik eta azkarren karbono isurietan neutroa izango den Euskal Herri baterantz begira jarri beharrean gaude, eta horretarako ezinbestekoa da eraldaketa



AJANGIZKO UDALA

azkar eta eraginkorrak egitea. Prozesu honek gure jendartean inplikazio anitz eta sakonak ekarriko ditu, bai arlo produktiboan, bai mugikortasunean, bai lurralde antolamenduan eta bar, horregatik, deritzogu pausu azkar eta eraginkorrak ematea ezinbestekoa dela.

Mozio honen bitartez, egoeraren larritasuna aitortzea dugu helburu, Larrialdi Klimatikoari behar besteko arreta ipintzeko asmoarekin, aurrerantzean politika publikoak Larrialdi Klimatiko egoeraz kutsa daitezen.

Hori horrela, EH BILDU Ajangizko taldeak honako mozioa aurkezten du

- 1.- Ajangizko Udalak Larrialdi Klimatiko egoeran gaudela aitortzen du.
- 2.- Ajangizko Udalak, Jaurlaritzak larrialdi klimatiko egoera deklaratu izana aurrerapausu moduan ikusten du baina erronka honi aurre egiteko beharrezkoa den karbonogabetze prozesua 2040 urtera aurreratzeko moduko plangintza eta politikak abiatzera premiatzen du bai Eusko Jaurlaritza eta baita Bizkaiko Foru Aldundia ere. Karbonogabetze prozesuan lagungarri izango direlakoan besteak- beste ondoko politika publikoak abiatzera premiatzen du:
 - a.- Gernika-Lumoko ospitala benetako eskualde mailakoa bihurtzea. Bertako biztanleei arreta hurbilduz.
 - b.- Eskualdean bertan enplegua sortzeko baldintzak sortzea. Gaur egun enplegu eta bizilekuaren artean ematen den arrakala apurtuaz, izan ere Busturialdeko populazio aktiboaren %70ak eskualdetik kanpo egiten du lan eta karbonogabetze prozesu serio batean hori irauli beharra dago.
- 3.- Ajangizko Udalak, Jaurlaritza aldaketa klimatikoaren eraginez pairatuko ditugun ondorioetara egokitzeko neurriak har ditzala premiatzen du.
- 4.- Ajangizko Udalak, bere eskumenen baitan, Aldaketa Klimatikoari aurre egiteko politikak garatzeko ahalegina egingo du.
- 5.- Ajangizko Udalak, udalerriko herritar, eragile eta auzotarrekin elkarlanean Larrialdi Klimatikoari buruzko sentsibilizazio kanpainak landuko ditu.
- 6.- Ajangizko Udalak bat egiten du, Larrialdi Klimatiko egoera dela medio, irailaren 27an deituta dauden ekintzak bultzatzeko. Eta herritar guztiak parte hartzera animatuko ditu.
- 7.- Ajangizko Udalak Bando baten bidez emango die mozio honen berri herritar guztiei.
- 8.- Ajangizko Udalak Bizkaiko Foru Aldundiari, Eusko Jaurlaritzari eta Espainiako transizio ekologikorako ministerioari bideratu die onartutako mozioa.

Ajangizen, 2019ko urriaren 7an.

